

18  
Q. D. O. M. B. V.

---

DISSERTATIO INAUGVRALIS MEDICA

---

DE

# DYSENTERIA

---

QVAM

RECTORE MAGNIFICENTISSIMO

SERENISSIMO PRINCIPE AC DOMINO

D O M I N O

GVILIELMO HENRICO

DVCE SAXONIAE IVLIACI CLIVIAE MONTIVM AN-  
GARIAE ET WESTPHALIAE COMITE SAYNAE  
ET WITTGENSTEINII RELIQA

---

P R A E S I D E

IOANNE ADOLPHO WEDELIO

PHILOS. ET MED. D. PRAXEOS ET CHIMIAE PROF. PVBL. ORD.

SERENISS. SAX. DVCVM CONSIL. AVLICO ET ARCHIATRO

TOTIVS ACADEMIAE ET FACVLT. MEDICAE SENIORE

ACADEM. NAT. CVRIOSOR. COLLEGA

PATRONO PRAECEPTORE AC PROMOTORE SVO

OMNI PIETATIS CVLTV PROSEQVENDO

---

PRO GRADV DOCTORIS

RITE OBTINENDO

DIE XIII. APRIL. M DCC XXXX.

PVBLICAE ERVDITORVM DISQVISIONI

SVBMISIT AVCTOR

GEORG. LEOPOLD. WEYLAND

HANOVIENSIS.

---

HORIS LOCOQVE CONSVETIS.

---

IENTAE LITTERIS RITTERIANIS.

Digitized by the Internet Archive  
in 2020 with funding from  
Wellcome Library

<https://archive.org/details/b31940067>



VIRIS

ILLVSTRIBVS, GENEROSISSIMIS,

CONSVLTISSIMIS, AMPLISSIMIS,

INCLYTAE LIBERAE S. R. I.

REIPVBLICAE

FRANCOFVRTENSIS AD MOENVM

PROCERIBVS

SPECTATISSIMIS

PRAETORI,

CONSVLIBVS,

SCABINIS,

SYNDICIS,

SENATORIBVS,

PATRO-

PATRONIS ET FAVORIBVS  
OMNI HONORIS AC PIETATIS CVLTV  
PROSEQVENDIS  
GRATIAM ATQVE FAVOREM SINGVLAREM,  
QVA MIHI PARITER AC FRATRI  
IN CIVIVM NVMERVM CLEMENTER RECEPTIS  
ADHVC FRVI LICVIT,  
HVMILLIME DEVENERANS  
HOC SPECIMEN INAVGVRALE MEDICVM  
ANIMI OBSTRACTISSIMI MONVMENTVM  
SVBMISSA AC DEVOTISSIMA MENTE  
CONSECRAT ATQVE OFFERT  
ILLVSTRIVM AC SPLENDIDISSI-  
MORVM NOMINVM

CVLTOR PERPETVVS ATQVE CLIENS  
GEORGIVS LEOPOLDVS WEYLAND.





I. N. I.

§. I.



**D**YSENTERIA exquisita & proprie dicta est febris comitata excretionem alui frequenti & torminosa, tanquam hypercatharsi spontanea, siue cum cruore, siue sine illo, cum aliis symptomatibus, ab his productis, a fermento acri acido-biliofo, tum in massa sanguinea febrim, tum in intestinis irritationem purgantem cum rosione & rasione, efficiente, dependens. Dysenteria spuria autem est diarrhoeæ gradus intensior sine febre, cum torminibus & deiectionibus crebrioribus vel sine cruore, vel, vasculis hæmorrhoidalibus simul reſeratis, cum eodem, ab acrimonia acido-bilioſa ſenſibili, intestinali tantum adſiciente, proueniens.

§. II.

Veteres dysenteriae nomen etiam imposuere excretionibus sanguinis per aluum aliis, & cruentas dysenterias appellarunt, vel cruentas excretiones, sine vlceratione intestinorum, vt quando vel purus sanguis extraordinarie excernitur, v. g. ab hæmorrhagia narium, vel mensibus, suppressis, vel a detruncatis artibus



bus, casu ab alto, interdum euenire solet; vel quando instar loturæ carnis excretio fit, vbi fluxus hepaticus postmodum vocatus est; vel, si fæces nigricantes instar picis exeunt, quod ob acorem austerum melancholicum fit, biliosas partes ita tingentem, quorsum etiam referri potest fluxus hæmorrhoidum, tum alias copiosus, tum inprimis torminosus aliquando apparens. Ipsi tamen hæc mala pro differentiis dysenteriae improprie dictis habuere, & illam tantum proprie dictam vocauerunt dysenteriam, quæ exulceratio intestinorum esset, fiens nempe, non facta. Per exulcerationem enim hanc nihil aliud intellexere, quam erosionem fortiolem a re acri & corrodente, cum quadam fibrarum absorptione & deperditione, quæ autem aliquando & in veram exulcerationem tandem abire potest. Dysenteria spuria similitudinem quandam cum exquisita habet, ob tormina, ob deiectiones crebriores, interdum & sanguineas, quia autem febris abest, vera & exquisita dici nequit. Ante autem recensitæ excretiones alui sanguineæ huc plane non pertinent, cum absint reliquæ conditiones dysenteriam notantes, vnde & ab hodiernis medicis non sub dysenteria, sed seorsim tractantur & considerantur. Non enim omnes fæces cruentæ signant dysenteriam, vt nec omnis dysenteria cum cruore est.

### §. III.

Dysenteriam exquisitam comitatam febrim esse diximus, præuius enim etiam hic est horror & subsequus calor, & statim simul excretio alui molesta adest, quæ non a febre, tanquam symptoma eiusdem, excitatur, nec febrim efficit vel producit, sed comes febris est;



est; adeoque vterque adfectus simul ægrum male habet, vt id quoque in aliis febribus comitatis, vt inflammatoriis & catarrhalibus, fit, vbi bini adfectus coniuncti videntur. Cum autem excretio alui præternaturalis magis in sensus incurrat, & ægris molestior videatur, sub comite hoc a plerisque consideratur dysenteria, imprimis, quia febris mitior quandoque est, vt haud ita attendatur. Modo autem hæc non negligatur, perinde erit, sub febribus, an sub alui fluxibus, de eadem agatur.

#### §. IV.

Cum igitur dysenteria vera nec sola febris, nec sola excretionis alui frequenti, torminosa, cum vel sine cruore, &c. absoluitur, sed vterque adfectus vna adesse debeat, sequitur, non vnum subiectum principale dysenteriae huic posse assignari. Febris enim subiectum est massa sanguinea, excretionis autem alui commemoratae subiectum sunt intestina vel tenuia, vel crassa, vel vtraque, tam ratione fibrarum neruearum, quam glandularum, ductuum & vasorum; adeoque etiam, vtrumque subiectum dysenteriae simul vt sit, necesse est.

#### §. V.

Febris dysentericae causa immediata est intemperies massæ sanguineæ calida, a fermento rarefactiuo inæquali proueniens. Excretionis alui torminosæ causa immediata est irritatio fibrarum neruearum intestinalium spasmodica, cum fusione humorum fermentifica, & apertione glandularum, ductuum & vasorum intestinalium, seorsim vel coniunctim, præternaturali. Atque hæ causæ simul sumptæ causam dysenteriae exquisitæ immediatam constituunt. Intemperiem calidam



dam febrilem a fermento rarefactiuo salino-sulphureo inæquali prouenire, in doctrina febrium iam euictum & ostensum est, sine hoc enim non febrilis, sed alia, intemperies calida sequitur. Irritatio fibrarum neruearum sentientium spasmodica tormina efficit; fibrarum neruearum motricium autem propulsionem contentorum, & hinc excretionem, præstat; fusio humorum fermentifica, acrimoniam, tenuitatem, & exeundi ex cavitatibus in spatium intestinorum facilitatem, infert, quam apertio glandularum, ductuum & vasorum præternaturalis, tam ab eadem, quam ab aliis, facta, promouet. Non inepte quidam hanc irritationem purgantem vocant, nam a purgantibus actiuioribus eadem laudata eueniunt, si magis, quam par est, irritant.

#### §. VI.

Tam febrim, quam irritationem purgantem, efficit fermentum acre acido-biliosum, quod causa dysenteriae mediata proximior est. Acrimoniam salino-sulphuream fermentiuam in eodem esse, eamque a salibus & partibus sulphureis, tali gradu eminentibus, & proportionem huic effectui respondente, dependere, certum est; determinari autem ad numerum & mensuram exacte id non potest, sed effectus id satis docet. Recte itaque cum SENNERTO faciunt, qui purgantibus vehementioribus, rodentibus, helleborinis, esulinis, colacynthiacis, &c. comparare hoc solent. Nam etiam a benignioribus, proprie dictis purgantibus, obseruatum est, quod aliquando hypercatharsin & dysenteriam, vel dysenteriae similem morbum, induxerint, multo magis vero ab acrioribus id fuit visum.

#### §. VII. Acri-



## §. VII.

Acrimonia acido-bilioſa huius fermenti non eundem ſemper gradum habet, ſed, prout ſalia & bilioſæ partes magis vel minus concentrata, & actiua, & copioſiora adſunt, eo vel vehementiorem, vel paulo remiſſiorem, & febrim, & irritationem purgantem, aliosque effectus, edit, vnde ſymptomata diuerſa oriuntur, præter illa eſſentialia. Fermentum itaque hoc, ob eminentes acres acido-bilioſas partes, in ſanguine hærens, motum inteſtinum peregrinum huic conciliat, vt partes igneæ, & partes ſalino-ſulphureæ copioſius, quam par eſt, liberentur & euoluantur, & concentrentur, ſeroſæ autem temperantes minuantur, adeoque calor maior præternaturalis ſeu febris fit, & pro gradu acrimoniæ huius diuerſo, ſanguini plus minus reſolutio intentatur ſucceſſiua. In inteſtinis autem idem obiectum irritans efficit, dum bilem & lympham, illuc accedentem, acriorem, acidiorẽ, roſiuam reddit, dicto modo; non poteſt itaque non fieri, quin inde irritatio purgans eueniat, roſio inteſtinorum, & tormina, abſterſio & abraſio muci illorum, oſcutorumque vaſorum reſeratio, fiat, aliaque grauiora ſequantur.

## §. VIII.

Fermentum eiſmodi vel in ipſo corpore oritur, vel ex alio corpore ægroto, vbi id iam adest, in corpus ſanum recipitur, illud conceptum, hoc illatum vocari ſolet. Concipitur tale fermentum, ſi vel lymphæ blanda ob temperiem aeris calidiorem nimis diſſoletur, bilioſæ vero partes acriores & efferatiores, roſiux, acidæ, vna cum lymphæ reſidua, reddantur; vel ſi talia adſu-  
mantur, quæ particulas acido-aqueas, acres, fermentifi-



cas copiosiores, vel concentratiores, in se continent., Infertur hoc fermentum iam factum per contagium. Hæc autem omnia ad causas mediatas remotiores pertinent.

§. IX.

Ex naturalibus causis temperamentum biliosum & sanguineum viciniora huic malo videntur, inprimis si sanguis vna abundet, quia biliosæ actiuxæ partes eminentes tunc sunt, & acrimonia facilius in his augetur. Nullum autem ab hoc malo exemptum est, si inprimis malignius sit. Nec vegeta ætas, quæ alias facilius a febribus corripitur, sola vel frequentius ita laborat, quin promiscue infantes, iuuenes, adulti, & senes ita adficiantur; nec sexus ratio hic habetur.

§. X.

Ex non-naturalibus maxime huc facit aeris constitutio calidior, vnde est, quod inprimis æstiuo tempore, & ordinarie mense Iulio & Augusto, rarissime extra hoc tempus, occurrat, maxime si inæqualis, modo æstuosus, modo frigidus euadat aer, vel austrinus eius sit status. Hieme vero accedente sopiri iterum solet. Cuius rei causa paulo ante fuit adducta. Fructus æstiuui vt pruna, cerea, & alia, inprimis non matura, mala persica, cerasa, nuces iuglandes, & eiusmodi alii, aliquando occasionem huic morbo præbent, cum gaudeant partibus acribus fermentificis copiosis, & magis adhuc, si potus frigidus vel sæculentus, vel alias fermentationem facile subiens, copiosius, illis iam adsumtis, hauriatur, qui & per se hic noxius est. Eadem, vt & flatulenta alia, si præsentem iam malo ingerantur, grauius illud reddunt, imo, si iam superatum visum fuerat, vt

denuo



denuo redeat, faciunt, si admittantur. Plures tamen, sine ullo talium usu morbum hunc sustinere coacti sunt. Hinc frustra hi fructus pro sola dysenteriae causa a quibusdam sunt habiti.

## §. XI.

Motus nimius, inprimis continuatus, dissipando lympham blandam, partes acres biliosas euoluendo & actiuiores reddendo; vigiliæ nimia, ira, simili fere modo, adfectum hunc promouent, vna cum reliquis. Metus & terror concentrando prius spiritus actuationem partium acrium postmodum promouent. Transpiratio insensibilis impedita, prægressa inprimis euolutione partium acriorum, & dissipatione temperantium, cum illæ secessum debitum habere tunc haud valeant, massæ sanguineæ denuo combinantur, &, quoniam eadem particula temperante magis orbatæ sunt, maiorem vim exercent, & liberationem similium, in massa sanguinea contentarum, præstant.

## §. XII.

Ex præternaturalibus causis inprimis est contagium, siue per sedem communem, siue per inspirationem exhalationum talium, siue per decubitum in eodem lecto cum ægro, siue alia ratione, miasma hoc corpori sano communicetur, cuius receptionem & actiuitatem metus & terror promouere potest. Purgantia vehementiora & acria, imo benigniora nimia dosi data, venena corrosiua, arsenicalia, huc quoque referri solent. Accusatur etiam ros acris corrosiuus peregrinus, fructibus inhærens, vbi tamen, cum rarissime occurrat, circumstantiæ probe examinandæ sunt, talis reuera fuerit, an aliæ potius causæ dysenteriam fecerint. Tacemus



alia rariora, v. g. adamantem non satis comminutum adsumtum, &c. quæ adferri solent, & prudenti investigatione opus habent, num proprie dictam dysenteriam excitauerint, an minus.

### §. XIII.

Spuria dysenteria sedem suam in intestinis tantum habet, adeoque nullam febrim comitem. Immediate eandem efficit irritatio intestinorum paulo intensior, quam in diarrhoea simplici. Hanc autem præstat succus pancreaticus & bilis, acido-acriores tali gradu si euaserint, vnde obiectum irritans constituunt. Acrimoniam talem inprimis a diætâ incongrua adquirunt, & maxime extra illud tempus, quo exquisita nascitur dysenteria. Crebriores itaque sedes fiunt, tormina iunguntur, & in quibusdam oscula vasorum hæmorrhoidalium aperiuntur, ideoque similitudinem quandam dysenterię veræ præ se fert, & nomen suum obtinuit.

### §. XIV.

Exquisita dysenteria differentias quoque habet varias. Ratione moris est vel benigna, vel maligna. Benigna est, in qua mitior & febris, & intestinorum irritatio occurrit, adeoque fermentum acre acido-biliosum mitius est, vnde etiam mitiora coniuncta sunt symptomata. Maligna autem, vbi febris & irritatio intestinorum vehementior & periculosior est, grauioraque symptomata adsunt, & tunc magis adhuc contagiosa deprehenditur, quod a maiori fermenti acrimonia, & resolutionem sanguini minitante, dependet. Ratione causæ pluribus communis epidemium in morem non raro inuadit homines, & fere tantum æstiuo tempore.



pore. Rarius paulo, & ex vitio indiuidui tantum, vnus vel alter ita laborat, reliquis etiam temporibus.

## §. XV.

Ratione materiæ excretæ vel rubra vel alba est dysenteria. Rubra dicitur, in qua cruentæ sunt deiectiones, & quidem tunc vel mixtus cruor est sedibus, vel solus ille & merus nonnunquam excernitur. Alba vocatur, quando vel sine cruore fæces exeuntes apparent, vel quando albida mera, lactiformia, instar lactis coagulati, crebrius exeuntia, se habent, quod raro fit. Fæces alias, vel cum vel sine cruore secedentes, deprehenduntur pituitosæ, mucosæ, biliosæ, virides, cum strigmentis, variegatæ, purulentæ, aliquando & nigræ ac foetidæ. Sanguis, qui exit, est vel dilutior, quod in principio fere fieri consuevit, prægressa materia tenui pituitosa, aliquantum flauescente; vel sincerus magis, vel con-  
grumatus.

## §. XVI.

Tres olim iuxta GALENUM & AETIVM gradus dysenteriae veræ, quam pro exulceratione intestinorum habebant, statuerunt; primus gradus ipsis fuit, si corpora quædam pingua excernerentur; secundus gradus, si ramenta quædam superficiei interioris membranosæ intestinorum exirent; tertius gradus dicebatur, si aliquid ex ipsa intestinorum substantia abrasum deiiceretur. Atque vltimo in hoc gradu non adhuc in fieri esse dysenteriam, sed iam factam, adfirmarunt. Recte autem ETMÜLLERVS cum HOLDERHOF-  
FIO de tali exulceratione dubitat, & non nisi in diu-  
turniore dysenteria, eaque grauiori, tandem excoriatio-  
nem, & forsan aliqualem exulcerationem locum habere,



quæ in ordinaria non statim statuenda sit, adfirmat in *Collegio Practico de dysenteria* p. m. 126. Neque tamen etiam carunculas tales, quæ apud auctores referuntur, quod aliquando excernantur in dysenteria, pro glandulis intestinalibus tumefactis, & morbi progressu a substantia intestinorum separatis, ut vult ETTMÜLLERVS, habere possumus, sed potius sanguinem ita con-grumatum & coagulatum fuisse, verisimile est. Hoc magis patere potuisset, si illæ particulæ, tam membranosæ, quam carneæ substantiæ speciem referentes, diligentius & accuratius fuissent examinatæ, in aqua tepida prius maceratæ, & cultro anatomico separatæ, ut certi essemus, reuera fibrosam substantiam in iisdem adfuisse.

#### §. XVII.

Adesse dysenteriam exquisitam, ostendunt & febris & irritationis intestinorum phænomena. Febrim innuunt horror præuius, calor subsequus, pulsus celer, sitis vehemens, appetitus prostratus, inquietudo, vigiliæ et similia. Irritationem intestinorum docent sedes a principio statim se exerentes; tormina ventris, in primis circa umbilicum, quæ successiue increscunt, et, si instet deiectio repetens, grauiora redduntur, & hinc iterum paulo leuantur. Deiectiones plerumque copiosæ sunt, ita, ut intra diem et noctem viginti, triginta, quadraginta et plures contingant, nonnunquam singulis momentis vrgent, et, ingruente nocte ingrauescunt. In quibusdam pauciores & rariores, cruentæ tamen, obseruantur sedes, aliquando sine cruore. Murmura exaudiuntur ventris, ardor ventriculi, cardialgia, anxietas, accedunt. Frequentius acrimonia magis, quam adflu-



xu, humorum peccante, ægros torquet tenesmus, & ni-  
fu tum alias, tum inani, continuante, & sæpius repe-  
tente, ani procidentia sequitur, maxime in tenerioribus.  
Vrina parcior redditur, humido copiosiori per aluum  
secedente, & alias a febris dissipato sero, adeo, vt ali-  
quando ischuria quasi adsit. His si iungamus causas  
manifestas prægressas, & in his æstium calorem, non  
potest non cognosci præsentia huius mali.

### §. XVIII.

Benigna si sit, omnia dicta molesta quidem sunt  
fatis, ferri tamen adhuc possunt, adeoque mitiora paulo  
sunt, nec vires nimis prosternuntur, nec alia grauiora  
symptomata se exerunt. Maligna autem plerumque  
statim febrim vehementiorem, omniaque symptomata  
iam recensita vehementiora, vires summe debiles, breui  
tempore exhibet, & præterea symptomata alia exclu-  
dit. Faucium ardor, siccitas, et inflammatio, ophthal-  
mia, petechiæ, purpura, aphtæ, aliaque accedunt, pul-  
sus inæqualis & debilior redditur. Interdum autem in  
principio latitat malignitas, non adeo magno apparente  
calore, nec aliis vehementioribus statim se exerentibus,  
quæ tamen postmodum se satis manifestant, vnde ca-  
uendum est, ne fallamur.

### §. XIX.

Spuria dysenteria ex febris absentia, reliquisque  
superius commemoratis præsentibus, cognoscitur fa-  
cile, quæ etiam non tantum æstiuo tempore, sed quo-  
uis alio, occurrit. Nec alias excretiones sanguinis, per  
aluum apparentes, pro dysenteria facile habebimus, si  
omnes circumstantias rite consideremus.

### §. XX.



## §. XX.

Benigna dysenteria mortem non facile infert, nisi negligatur, & errores præterea committantur, & latitans maligna pro benigna in principio habeatur. Negligitur autem, si remedia apta non satis mature in usum vocentur, ubi in deterius ruit, maligna redditur, & vitæ periculum minatur. Maligna autem in dysenteria semper periculosus & dubius est euentus, pluresque inde moriuntur. Maius adhuc periculum minantur, virium maior prostratio, febrisque vehementior, inflammatio faucium, petechiæ, purpura, aphthæ. Idem timendum est, tenuia intestina magis si adfecta sint, quod esse intelligitur, si tormina magis altius circa umbilicum hæreant, ferocioraque sint, & paulo tardius post dolorem sedes fiant, cruorque reliquis recrementis magis mixtus sit; cruor sincerus, copiosior, corpuscula carnosa quasi, & strigmenta, cum reliquis si prodeant, & nausea, vomitus, vel simplex, vel cruentus, appetitus plane nullus per plures dies, si adsit. Maxime funestum est, si deliria, motus convulsiui, singultus, nisi ab adsumto cibo & potu tantum, sed a morbo, proueniat; si adsumta fluida non tam deglutiantur, quam decidant cum sonitu in ventriculum, excreta si sint viridia, æruginosa, nigra foetentia, corruptionem notantia; tormina subito si cessent, reliquis tamen grauioribus permanentibus, vt &, si sedes sine ægri sensu prodeant, sphacelosum enim statum intestinis conciliatum hæc innuunt, & spirituum destructionem, quod & lipothymix ingruentes, & frigus extremorum cum virium resolutione, notat.

## §. XXI.



## §. XXI.

Contraria his si appareant, vires inprimis pro ratione morbi sibi sic satis consent, appetitus non prorsus absit, sed magis redire incipiat, ructus ab adsumtis eueniat, coctionem ventriculi incipientem innuens, a remediis leuamen si sentiat æger, symptomataque successiue mitigentur, post torminosam excretionem lactiformes deiectiones fieri incipiant, redeuntis chylicationis nota, melior spes adfulget. Robustiores quidem melius respectiue ferre hunc morbum possunt, quam teneriore textura præditi, visi tamen sunt iuniores sæpe præ senibus mortui dysenteria. Grauidarum quoque peculiare robur, hoc malo laborantium, obseruatum est, ita, vt iisdem non facile abortum nec mortem attulerit.

## §. XXII.

Spuria dysenteria cum febris careat, in se periculosa esse haud consuevit, nisi causa quædam grauis & rebellis subsit, & diutius durans, neglecta inprimis, alia post se trahat, tale quid præstantia.

## §. XXIII.

Exquisita dysenteria instar acutarum febrium, die vel septimo, vel decimo quarto finiri consuevit, quo vehementior autem est, eo citius ordinarie iudicatur. Benignior autem itidem vel citius, vel paulo tardius superatur, rarius ad vltimum acutorum terminum perdurare solet, quod specialiores circumstantiæ præsentis determinant. Spuria autem, pro causarum diuersitate, vel breuius cedit, vel longius ægros detinet.

C

## §. XXIV.



## §. XXIV.

Modus euentus ita se habet, vt vel ad salutem, vel ad mortem, vel in alium morbum transeat. Ad salutem contingit, si fermentum illud acre perfectam disiectionem & correctionem admittat, nec labes enormior intestinis, vel aliis partibus, fuerit inducta. Ad mortem autem abit vel resolutione sanguinis destructiua, vel inflammatione & gangræna intestinis conciliata, indeque promte consequente sphacelo; vnde & post mortem hæc, aperto corpore, fuere inuenta, aliquando & mutuus intestinorum ingressus ob spasmodicam fibrarum talem contractionem fuit visa; vel vtroque modo simul vitæ extinctio fit. In alium morbum abit, si vel tumor pedum sequatur, sanguine ita partibus balsamicis orbat, vt lymphæ circulus impediatur, & tumorem hunc efficiat; vel ipse etiam hydrops, visceribus vna obstructis & debilitatis enormius. Aliquando lenteria succedit, quando balsamicæ & actiuiores lymphæ partes, & spirituosæ adsumtæ magis sunt, adeoque menstruum ventriculi iners magis redditum, elaterque fibrarum ventriculi & intestinorum debilitatus est ab hoc morbo. Scabies interdum dysenteriam sequitur, si lymphæ, huius culpa, acrimonia falsa, muriatica & crementitia fuerit conciliata, & hinc non blanda & dulcis iterum euaserit, correctione & secessu salium non perfecte obtentis. Tartareæ salinæ partes in dysenterico corpore si vna eminentes fuerint, reliquis domitis, hæc actiuiores remanentes nonnunquam arthritidem, superata dysenteria, efficiunt. Tacemus alia mala, quæ, non decenter obtenta perfecta morbi huius correctione, euenire possunt.

## §. XXV.



## §. XXV.

Curatio dysenteriae postulat, vt 1) fermentum acre acido-biliosum disiiciatur, 2) acrimonia lymphæ & bilis rosua corrigatur, 3) fibrillæ intestinorum irritatæ demulceantur, & sibi reddantur. Cum enim tam febris, quam irritatio intestinorum purgans ab hoc fermento dependeat, hoc disiecto & febris, & irritatio, cessabit, ipsiusque acrimoniæ dictæ vltior productio refrenabitur. Quoniam autem lymphæ & bilis euolutas partes salino-sulphureas in se iam continent, & effectum morbosum præstent, hæ etiam corrigendæ erunt. Fibræ intestinorum autem tam sentientes, quam mouentes cum ab obiecto irritante vehementius adficiantur, hæ etiam demulcendæ, & si vltiorem læsionem inde adquisuerint, sibi reddendæ & roborandæ sunt.

## §. XXVI.

Fermentum acre acido-biliosum disiiciunt & corrigunt bezoardica & diaphoretica, minus autem volatilia vrinosa, vel acida, sed balsamica & roborantia simul, tam media, quam fixa. Conueniunt hinc tinctura bez. Wedel. essentificata, essentia alexipharmaca Stahlii, eff. pimpinellæ alb. scordii, eff. theriacalis balsamica, mixtura simplex rectificata; puluis bez. Sennerti, maior Wedelii, puluis Pannonic. ruber, spec. de hyacynth. lap. bez. lap. de Goa, pulu. dysenter. Crollii, Michaelis, aliorum, electuar. de ouo, &c. cornu ceru. philosoph. præpar. vt & vstum, ebur sine igne parat. dens hippopot. terra figillata, bolus Armena, terra Lemn. antimon. diaphor. antimon. mart. cach. & similia. Huic indica-



tioni simul fatifaciunt, quæ reliquis conueniunt, vnde & apte his vel mifcentur, vel interponuntur.

§. XXVII.

Acrimoniam lymphæ & bilis rofiam corrigunt, tam ipfa iam laudata bezoardica & diaphoretica, partim diffipando falia peregrina, partim abforbendo, quod faciunt inprimis fixiora & terrea fimul, quam alia his iungenda. Sic acrimoniam hanc corrigunt, fi, vifcido lento in inteftinis remixta, iis adhærefcat firmitus, vifcidum blande refoluentia, & refolutum vna cum falino-fulphureo acri euacuantia. Nifi enim hoc fiat, remanet & irritationem continuat, & adfluxum auget, ipfumque incrementum capit. Adfluentes enim humores, hoc non foluunt, fed particulas relinquunt, huic iterum adhærentes, & vifcofitatem ob calorem maiorem adquirentes. Aptiffimum huic fcopo eft rhabarbarum, quod poft euacuationem robur fibrarum relinquit, tum alias tum cum æquali quantitate nitri depurati, mixtum. Alii pilulas Becheri pro eodem fcopo propinant. Circa ventriculi confinia tale vifcidum acrimoniam eiusmodi habens fi hæreat, rad. ipecacuann. exhiberi folet, vt per vomitum blandum eliminetur. Sed hæc in initio morbi magis locum habent, non facile in progreflu, nifi fpécialiores circumftantiæ id requirant. Alia autem purgantia & emetica, inprimis actiuiora, neutiquam hic conueniunt. Venæfeftio vero aliena hic eft.

§. XXVII.

Eandem acrimoniam etiam corrigunt alia abforbentia, quam fub bezoardicis iam contenta, vt lapis hæmatites, corallia, conchæ, mater perlarum, rafura  
cranii



cranii humani, vnicornu veri, crySTALLUS montana, spodium, ipsumque album Græcum, & similia alia. Huius quoque conditiones sunt puluis stypt. Crollii, Heurnii, Wedelii, albus & ruber, a quibus non tam adstrictio noxia timenda est, cum alia interponantur & misceantur, eandem prohibentia, quin potius magis decenter vna roborent.

### §. XXVIII.

Corrigunt eandem sulphurea blanda, vt cortex chaquerill. eiusque essentia, essentia millefolii, sanguis draconis. Corrigunt sulphurea anodyna, theriacalia, opiata; theriaca Androm. eff. eiusd. balsam. theriaca cælestis, diascord. Fracastor. mass. pilul. de cynogloss. eff. anod. extract. anod. quæ bezoardicis, absorbentibus, aliisque apte miscentur, & quædam etiam per se sumi possunt, vt diascord. laudatum; essentia anodyna, eff. ther. balsamica mixturis recte additur. Quidam quidem reiiciunt anodyna, sed satis his ab E T T MÜLLERO aliisque practicis felicissimis est responsum, nec quoque hic abusus tollit vsum. Eo magis autem hic profunt, quoniam non solum acrimoniam illam efficacius temperant, verum etiam, educationem partium harum, & ipsius fermenti, per poros cutis iuuant & promouent.

### §. XXIX.

Acrimoniam hanc temperant etiam sulphurea gelatinosa, quæ inuoluunt & obtundunt salia. Talia sunt priapus ceti & cerui, sanguis leporis, & agni exsiccatum, hepar serpentum exsiccatum, vt & viperarum, vngula equina, ossa animalium philosophice præparata, ob gelatinam



tinam ibi adhuc residuam, gummi Arabicum, quod quidam maxime extollunt, gummi tragac. rad. symphyt. mai. gelatina cornu cerui, eboris. Temperant quoque biliosam acrimoniam nitrosa, sed parcius reliquis mixta, vel in liquidis potius soluta & diffusa, ut minime stimulum vel præbere, vel augere, possint, fibrillis enim nerveis sic minime sensiles euadunt, & tamen bilem coercent.

### §. XXX.

Temperant tandem diluendo, quæ serum blandum restitunt. Magis autem hic conueniunt, quæ simul partibus gelatinosis gaudent ut decoct. hord. cum C. C. & scorzonera, decoct. priapi cerui, imo decoctum herbæ Thee utilitatem aliquando præstitit. Laudantur quoque hic emulsiones ex sem. 4. frig. amygdal. dulc. sem. pap. alb. ut & potiones ex aquis destillatis. Verum cum actu frigida adsumta, alias etiam bona, in dysenteria malum effectum præbeant, melius ab iisdem abstinemus, vel ingredientia ex his apta decoctis addimus. Commodum quoque est decoctum auenaceum sibi relictum. Lac bubulum cum triplo aquæ remixtum, quod SYDENHAM laudat, calide haustum prodesse quidem potest, meliora autem sunt decocta alias partes gelatinosas continentia.

### §. XXXI.

Tertiæ indicationi, secundum quam demulceri fibræ irritatæ & sibi restitui debent, ratione prioris scopi iam dum vna satisfit per priora adducta. Dum enim obiectum irritans disiicitur, vim suam in fibras exercere non amplius ita vehementer potest, ut antea, sique acrimo-



acrimonia lymphæ & biles corrigitur, etiam obiectum irritans mitigatur, adeoque demulcentur vna fibræ nerveæ. Magis autem fibras dictas demulcent, quæ illas defendunt, ne adficientur ab acrimonia, talia autem imprimis sunt gelatinosa & opiata, hinc & absorbentia, & ideo tertiæ simul indicationi satisfaciunt. Et quoniam anodyna etiam adfluxum spirituum nimium temperant, eosque pacatiores reddunt, hæc quoque demulcent fibras irritatas. Quidam pro hoc fine laudant oleum amygdalorum dulcium, ol. oliuarum, ol. lini adsumtum, sed non satisfaciunt hæc desiderio, nec reliquis indicationibus respondent, imprimis enim fermentum febrile simul oppugnandum & expugnandum est, quod neuti- quam a talibus expectari potest oleis. Adeoque iam laudata longe his anteferenda sunt. Ad demulcendas fibras in torminibus vrgentibus, ubi flatus sunt coniun- cti, a quibusdam decoctum pugillare feminis carui in- star herbæ Thee adhibitum commendatur, quod ad- mitti potest, si nec calor maior sit præsens, nec decocta temperantia interposita negligantur. Præter interna dicta externa remedia ad demulcendas fibrillas irritatas vtilia sunt, vt ol. externum ex ol. hyosciami plantagi- nis, rutaceo, chamomillæ, &c. additis ol. petræ nucist. mac. anis. carui, iuniperi succ. alb. ceræ & aliis, regio- nem dolentem his inungendo & facculum paregori- cum calefactum imponendo, ex rad. galang. cal. arom. angel. zedoar. herba chamomill. cum tot. menthæ, abro- toni, flor. cham. R. melilot. verbasc. sem. carui, nucista, furfuribus triticeis vel aliis. Excretionem copiosiori vna vrgente cataplasma ex ther. Andromachi c. pulu. nucistæ vel oleo huius expresso, aliisque, ipsoque oleo carmin.

Mynsicht.



Mynsicht. vel simili, regioni vmbilicali vel ventriculi impositum leuamen adfert,

§. XXXII.

Intestini recti fibræ circa exitum, si ita irritentur, vt tenemus ægros torqueat, ad easdem demulcendas præter dicta suffitus conueniunt ex floribus verbasci, gumm. anim. thure, mastiche, colophonia, &c. admisso ad anum fumo, si desidere frustra cogatur æger. Clysteres tam in torminibus, quam etiam in tenesmo proponuntur a quibusdam. Altius autem si adfecta sint intestina, illuc non penetrant, in recto intestino autem stimulus si hæreat, aliquid præstare possunt, si terebinthinati sint, sed sine his expediri res potest melius.

§. XXXIII.

Vigiliæ si vrgeant, eodem modo, vt in febribus aliis, fibræ demulcendæ sunt, opiatibus bezoardicis fermentatis, vt diascord. Fracast. & reliquis, prudenter in vsum vocatis; vti & reliqua febribus communia symptomata eodem modo, ac in his, mitiganda veniunt.

§. XXXIII.

Fibræ intestinorum in tantum si irritatæ sint, vt erosio aliqualis sit, vel exulcerationis cuiusdam indicia se exerant, ita sibi reddendæ sunt, vt traumatica & roborantia reliquis miscenda, vel interponenda sint, vt ess. traumat. W. essent. terræ lapon. tormentill. bistort. hyperici, &c. balsamum Peruuianum, & quæ alias in intestinorum exulceratione proficua sunt, exhibere tunc conuenit.

§. XXXV.



## §. XXXV.

Spuria si adsit dysenteria, cum ad diarrhoeam paulo intensiorem pertineat, eodem quoque modo curari debet. Quod si autem tali tempore æstiuo ingruat, ubi vera alias infestare consuevit, ne fallamur facile oblatentem & mitiorem febrim, tutius eodem tractatur modo in principio ac dysenteria, sic enim æger nullum damnum subit, & postmodum tamen ea recte agi possunt, quæ status tunc certior redditus exposcit. Hæmorrhoides etiam vna se exerentes quoniam cum euphoria magis fiunt, statim innuunt, quid faciendum sit.

## §. XXXVI.

Omnibus laudatis indicationibus conformis debet etiam diæta esse, ut aer frigidus maxime vitetur, semper autem temperate calidus sit, nimius autem calor æque esset noxius. Ne vero æger, desiderare coactus, refrigeretur, vel vestimentis & tibialibus ad hanc rem commodis arceri aeris liberioris accessus debet, vel vas aptum, hanc in rem factum, tempore conatus accedentis ægro supponatur, ut deumbens deponere alium commode queat. Cibus si desideretur ab ægro, sit facile resolubilis nec ullam habeat acrimoniam sensilem, iuscula profunt auenacea & alia temperata; carnes pullorum, vitulinæ & aliæ teneriores, si appetitus adsit, non nocent, ut & affata leporina, moderata tamen quantitate; si abnuat æger, persuadendus is non est. Potus cerevisiæ defæcatæ, nec frigide, sed calide, adsumptæ cibationis tempore non nocet, extra hoc autem potus ex decoct.

D

hord.



hord. c. C. C. auenaceo decocto, & similibus, itidem calide haustus, vtilior est. Mature vt decumbat æger, initium mali si fiat, conducit, imo necessarium est, quies enim commendata tunc esse debet maxime. Somnus haud impediatur, sed, si vigiliæ vrgeant, aptis promoueri potest remediis. Animi adfectus fortiores omnes alieni sunt, tranquillitas eiusdem optima est. Transpiratio in sensibilis conseruare sollicitè debet, ita enim alui excretio præternaturalis reliquæque facilius superantur.

S. D. G.





NOBILISSIMO DOCTISSIMOQUE  
RESONDENTI

GEORGIO LEOPOLDO  
WEYLAND

MEDICINAE DOCTORANDO DIGNISSIMO

S. D. P.

GEORGIUS ERHARDVS HAMBERGERVS.

---

**D**vo esse artis medicae fulcra rationem  
et experientiam, nullus artis peritus  
negat. Corpus humanum esse cor-  
pus physicum, peculiari mechanico modo  
structum, in quo perpetuae partium fluida-  
rum fiunt motus, resolutiones et compositio-  
nes, hinc fundamenta artis medicae genera-  
liora esse Mathesin, speciatim Mechanicam,  
Physicam atque Chimiam, specialiora vero,  
Anatomiam et observationes phaenomeno-  
rum in corpore humano quotidie occurren-  
tium, probatione non eget. Vti igitur hae  
doctrinae secundum regulas logicas rite in-  
ter se combinatae primum Medicinae ful-  
crum, rationem nempe, constituunt, nec  
vllus Medicus, in hisce disciplinis hospes,  
rationalis dici potest, sic et contra is ne Me-  
dici quidem nomen meretur, qui haec sola,  
D 2 quam-



quamquam optime, intelligit. Non dicam  
jam Medicinam esse artem, hinc habitum,  
nulla theoria addiscendum, sed id volo, cum  
omnis theoria in generalioribus subsistat,  
nec specialissimae determinationes, in praxi  
summe necessariae, vel optimae theoriae  
ope, addisci queant, aequè pessime eum re-  
bus consulere suis, qui sola theoria instructus,  
praxin exercere audet, quam qui, absque  
theoria, per meram expectationem casuum  
similium artem exercet. Te prudenter vi-  
tam egisse academicam, alterum quod iam  
edis eruditionis egregiae specimen, satis pro-  
bat: nihil omisisti quod ad Theoriam ad-  
discendam et certitudinem in Medicina ob-  
tinendam, requiritur, sed his minime con-  
tentus, praxeos praecepta omni studio Tibi  
reddidisti familiaria, hinc merito a gratiosa  
nostra Facultate Doctoris dignitas et jura  
Tibi conferuntur, de quibus ego Tibi Patriae  
vero Tuae, de Medico prudente et docto,  
gratulor, et, ut Benignissimum Numen labo-  
ribus Tuis practicis, ita porro, uti studiis  
Academicis, adsit, ex animo opto. Dab.

Ienæ d. 13. Apr. 1740.

✻ ( \* \* \* ) ✻